

Povodom međunarodnog Dana voda, koji se već dvije i pol decenije obilježava širom planete, aktivisti udruženja Zeleni Neretva su organizirali skromni performans u Konjicu. S obzirom da je tematika ovogodišnjeg Dana voda usmjerena na problem „otpada i voda“, udruženje Zeleni Neretva je iskoristilo ovaj povod da se oglasi i podsjeti lokalnu konjičku javnost na prisutnost velikog i dugogodišnjeg problema u vidu tehnoloških otpadnih voda, koje se uglavnom bez prečišćavanja ispuštaju u Neretvu od strane neodgovornih privrednih subjekata. Stoga je i transparent sa natpisom, kojeg su aktivisti postavili pored Kamene ćuprije i rijeke Neretve, glasilo „Pusti rijeku neka teče - čista!“

Ovom prilikom je iz udruženja Zeleni Neretva Konjic poručeno (prilično neinformiranoj) lokalnoj javnosti da se problem otpadnih voda u (pri)gradskoj zoni Konjica neće u potpunosti riješiti općinskim projektom izgradnje kolektora i prečišćivača. Ovim velikim projektom, koji je pred završetkom, namjerava se sakupljati i prečišćavati isključivo komunalni otpad. Dakle, ostatak otpadnih voda, a koji dolazi (uglavnom) iz metalne industrije, neće biti obuhvaćen pomenutim općinskim projektom. Privredni subjekti koji u svom tehnološkom procesu proizvode i ispuštaju „tehnološke otpadne vode“ dužni su po zakonu obezbijediti vlastiti tretman svojih otpadnih voda i to u skladu sa Pravilnikom o graničnim vrijednostima ispusta tehnoloških otpadnih voda. Drugim riječima, svaki eventualni zagađivač dužan je da vrati u vodotok iskorištenu vodu određenog kvaliteta čistoće, ovisno o granicama koje propisuje Pravilnik. Nažalost, većina industrijskih zagađivača u Konjicu ne posjeduje adekvatne uređaje za prečišćavanje. Zašto inspekcijska služba ne uvede red u ovu oblast nije nam poznato. Ali poznato je da građani Konjica bez prevelikog uzbuđenja gledaju narandžaste pjeskovite obale, ofarbane od željeznog oksida (poznat kao hrđa) koji je friško ispušten iz neke od firmi koje su smještene u industrijskom kompleksu pored Neretve. I da, ova hrđa (ili željezni oksid) se veoma jasno vidi čak i sa Pomola, ali se čini da je mnogo veći problem „ono“ što se ne vidi - barem ne bez adekvatnih hemijskih analiza. A takve se odavno ne vrše na ovom lokalitetu Neretve. Na lokalitetu koji sa prvim ljetnim danima postaje glavna konjička plaža na Neretvi.

Izvor: zeleni-neretva